

Passa 60 000 discurren rumantsch

La digren dal rumantsch n'è betg uschè dramatica sco annunzià oriundamain

DA LUCAS DEPLAZES

■ **Tar l'economia vegn oz pretendi che betg il meglier gudognia, mabain il pli svelt. Che quai na constat betg dapertut cumprova la publicaziun dals resultats da la dumbraziun dal pievel da l'onn 2000 davart las indicaziuns da las linguas.** Tenor las emprimas indicaziuns dal december 2002 da l'Uffizi federal da statistica fiss il dumber da las Rumantschas e dals Rumantschs sa sminuì per 11,4%. En ils commentaris è la situaziun vegnida giuditgada sco alarmanata e sco segn da la mort dal rumantsch.

In'analisa da las cifras davart la «lingua discurrenda» lubescha autras conclusiuns e demussa che las cifras publicadas oriundamain na correspundan betg a la realitad. Las indicaziuns en la rubrica «lingua discurrenda» muntan per blers Rumantschs in indizi ch'els èn d'origin rumantsch e vulan restar Rumantschs, era sch'els na considereschan lur lingua materna betg pli sco lingua principala. Quai vala per Ru-



Las dumondas dal questiunari da dumbraziun sfalsifitgeschan il dumber effectiv dals Rumantschs. P. DE JONG

mantschs che vivan en in curn d'auter linguatg. En quest senn stuess la dumonda vegnir reponderada concernent la lin-

gua suttamessa als Rumantschs tar la dumbraziun dal pievel. La LQ publicgescha oz ils resultats detagliads dals Rumantschs en

las vischnancas grischunas, dals chantuns e da las grondas citads.

➤ COMMENTARI E PAGINAS 2 E 3

■ COMMENTARI

Eliminar statistica discriminanta

DA MARTIN CABALZAR

Cu ins ha communitgà avant dus onns ils emprims resultats provisoris da la dumbraziun dal pievel è ina unda da surpraisa e dischillusiun ida tras la Rumantschia. Ins è sa dumandà cun raschun sche las stentas interpridas ils ultims onns per mantegnair e promover il rumantsch sajan stadas per il giat. Entant ch'els ins han resignà en vista a la digren dramatica, han auters nizzegia la chaschun da dar cun il pugn sin maisa e da preten-der dal stadi in engaschament pli substanzial a favur dal linguatg naziunal il pli periclità.

Las novissimas cifras si da Berna relativeschan in pau la dramatica da questa digren dal rumantsch. Radund 30 000 persunas inditgeschan il rumantsch sco linguatg principal, passa 60 000 persunas discurren regularmain rumantsch e tenor retschertgas da la SSR chapeschan tuttina dapli che 100 000 persunas noss linguatg.

Per chapir questas differenzas ston ins savair che la gronda part dals Rumantschs viva oz en ina situaziun bilingua. En famiglia ed en il vitg pleda ins rumantsch, ella veta professiunala tudestg ed en la vita publica forsa domadus. Quai documentescha la gronda flexibilitad linguistica ed era spirtala dals Rumantschs. Gist en noss mund globalisà survegn la plurilinguitad adina dapli impurtanza, per avantatg dals Rumantschs ch'èn disads da pitschen ensi cun duas linguas.

La bilinguitad rumantsch-tudestga è pia in avantatg ed ina schanza. Nairas uras che la statistica federala elimineschia uss la distincziun da lungatg principal e linguatg discurrenda che dischriminescha ils Rumantschs. Ils Rumantschs savessan schizunt servir sco exempel per ils Svizzers monolings. In professer ha manegià dacurt: La monolinguitad è ina mal-sogna, ma ella è curabla.